



Broj: X-K-10/876-2

Sarajevo, 22.10.2010. godine

U IME BOSNE I HERCEGOVINE!

Sud Bosne i Hercegovine u vijeću sastavljenom od sudije Biljane Ćuković, kao predsjednika vijeća, sudija Halila Lagumdžije i Amele Huskić, kao članova vijeća, uz učesce Curović Tanje u svojstvu stručnog saradnika, u krivičnom predmetu protiv optuženih Falak Vedrana, Rebac Željka, Orbović Dragana i Savić Stanka, zbog krivičnog djela Organizovani kriminal iz člana 250. stav 1. KZ BiH, a u vezi sa krivičnim djelom Neovlašteni promet opojnim drogama iz člana 195. stav 2. KZ BiH, po izmjenjenoj optužnici Tužilaštva Bosne i Hercegovine broj T20 0 KT 0000275 10 od 21.10.2010. godine, nakon održanog ročišta za razmatranje sporazuma o priznanju krivice i pretresa za izricanje krivičnopravne sankcije, u prisustvu tužioca Tužilaštva BiH, Saše Sarajlića, optuženih lično i njihovih branilaca, advokata Suade Halilagić, Zdravka Rajića, Omara Mehmedbašića i Gorana Neškovića, dana 22.10.2010. godine, donio je i javno objavio

P R E S U D U

OPTUŽENI:1)FALAK VEDRAN, sin Nikole i majke Slavice djevojački Dragičević, rođen 12.08.1979. godine u Metkoviću, R. Hrvatska nastanjen u ulici „Petra Krešimira“ IV bb, opština Čapljina, po nacionalnosti Hrvat, državljanin Bosne i Hercegovine i Republike Hrvatske, pismen, po zanimanju policijski službenik PU Čapljina, završena Srednja policijska škola, oženjen, otac dvoje maloljetne djece, srednjeg imovnog stanja, neosuđivan, nije služio vojsku, posjeduje JMB:1208979151148.

2) REBAC ŽELJKO zv. „Želja“, sin Zlatka i majke Vojislave djevojački Boljević, rođen 22.03.1970. godine u Čapljini, nastanjen u ulici „Ante Starčevića“ bb opština Čapljina, po nacionalnosti Hrvat, državljanin Bosne i Hercegovine i Republike Hrvatske, pismen, po zanimanju mehaničar mašina i postrojenja, završena SSS, oženjen, otac jednog malodobnog djeteta, srednjeg imovnog stanja, neosuđivan, služio vojsku u Beloj Crkvi, posjeduje JMB2203970151147.

3) ORBOVIĆ DRAGAN, sin Ćetka i majke Jovanka djevojački Nenadić, rođen 28. 01.1970. godine u Gacku, nastanjen u Nikšiću, Republika Crna Gora, na adresi ulica „Dragolučki“ br.12, po nacionalnosti Crnogorac, državljanin Republike Crne Gore, pismen, završena SSS, po zanimanju nekvalifikovani radnik, oženjen, lošeg imovnog stanja, neosuđivan, služio vojsku u Osijeku, posjeduje JMB 2801970260013

4) SAVIĆ STANKO, sin Nikole i majke Zorke djevojački Dragojević, rođen 27. 03. 1969. godine u Banja Luci, gdje je i nastanjen u ulici „Omladinska“ broj 104, po nacionalnosti Srbin, državljanin BiH, pismen, po zanimanju mašin bravar, završena SSS, oženjen, otac jednog djeteta, srednjeg imovnog stanja, neosuđivan, služio vojsku u Prištini i Tuzli, JMB 2703969100035

KRIVI SU

ŠTO SU: Od početka 2010. godine, Falak Vedran, Rebac Željko, Orbović Dragan i Savić Stanko, pristupili organizovanoj grupi lica u smislu člana 1. stav 19. KZ BiH koju je organizovao Perić Zvonko radi međunarodne prodaje, prevoza, prijenosa i daljnje isporuke opojne droge „skank“, koju je kupovao od njemu poznatih lica iz Republike Crne Gore i NN lica sa područja Bosne i Hercegovine, a koja opojna droga je Konvencijom o psihotropnim supstancama od 1971. godine i Rješenjem o popisu opojnih droga („Službeni list RBiH“ br. 2/92 i 13/94) proglašena opojnom drogom i čiji je promet zabranjen u skladu sa odredbama Zakona o proizvodnji i prometu opojnih droga („Službeni list RBiH“ br.2/92 i 13/94) i Zakona o sprječavanju i suzbijanju zloupotrebe opojnih droga („Službeni glasnik BiH“ br. 8/06), te su opojnu drogu organizovano prodavali njima poznatim licima u Republici Hrvatskoj i Bosni i Hercegovini, i to tako da je Perić Zvonko, početkom januara 2010. godine, ostvario kontakt sa Međedović Nenadom zvani Neno iz Republike Crne Gore, te dogovorio nabavku i isporuku nepoznate količine opojne droge skank u cilju dalje prodaje na teritoriji Bosne i Hercegovine i dalje u Republici Hrvatskoj, pa su tako:

1) Falak Vedran, Rebac Željko i Savić Stanko, zajedno:

U periodu od polovine septembra 2009. godine pa do kraja januara 2010. godine izvršili u četiri (4) navrata prebacivanje ukupno oko 48 kg opojne droge skank iz Republike Crne Gore u BiH, i to na način da je prvooptuženi Perić Zvonko kao organizator, zajedno sa Falak Vedranom, Rebac Željkom, Šutalo Mirom i Savić Stankom, kao članovima ove grupe, u više navrata izvršio transport opojne droge skank iz Crne Gore u Bosnu i Hercegovinu, u mjesto Stolac, a zatim preko Čapljine u Banja Luku, i to na način da nakon što bi Perić Zvonko i Međedović Nenad dogovorili količinu, cijenu i isporuku opojne droge skank, Međedović Nenad bi iz Republike Crne Gore, istu drogu prebacivao do općine Stolac gdje je istu preuzimao Šutalo Miro i po naredbi Perić Zvonka dovezio u garažu Rebac Željka u mjesto Trebižat, općina Čapljina a u kojoj garaži su Rebac i Falak vršili prepakivanje opojne droge skank i istu sakrivali u unutrašnjost prednjeg i zadnjeg

branika motornog vozila koje bi kasnije Topić Vinko vozio u Banja Luku gdje ju je preuzimao Savić Stanko u cilju dalje preprodaje na području Bosne i Hercegovine.

2) Falak Vedran, Rebac Željko, Savić Stanko i Orbović Draga ,zajedno:

Dana 30.05.2010. godine nakon što je Perić Zvonko dogovorio kupovinu, cijenu i isporuku iz R. Crne Gore sa Međedović Nenadom, dana 31. 05. 2010. godine u kasnim večernjim satima, prvooptuženi Perić Zvonko kao organizator sa svojim osobnim motornim vozilom marke Citroen C4, reg. oznake: 519-M-933 otišao u mjesto Berkoviće, općina Berkovići gdje je od petooptuženog Orbović Dragana preuzeo oko 30 kg. opojne droge skank koju je utovario u svoje vozilo i skupa sa Orbović Draganom uputio se prema Stocu, da bi u mjestu zvano „Centrala“, opojnu drogu prebacio u motorno vozilo marke Audi A6, reg. oznake E90-M-860 kojim je upravljao Šutalo Miro, koji istu drogu po naredbi Perića prebacuje do parkinga hotela „Mogorjelo“ u Čapljini, da bi nakon što je stigao na parking opojnu drogu Šutalo Miro skupa sa Rebac Željkom i Falak Vedranom, prebacili u motorno vozilo marke Nubira, reg. oznake: ZG 9927 V koje koristi Rebac Željko sa namjerom da istu prebace do vozila Savić Stanka koji ih je po naredbi Perića, čekao u Čapljini i koji je opojnu drogu trebao da proda na području BiH a u čemu su spriječeni od strane policijskih službenika Državne agencije za istrage i zaštitu.

3) Falak Vedran i Rebac Željko, zajedno:

Dana 19. februara 2010.godine nakon što je Perić Dario zvan Crni kao organizator grupe u kojoj su se kao članovi priključili Falak Vedran i Rebac Željko istim predao opojnu drogu skank u količinu od 33 kg, isti su po naredbi Perić Daria opojnu drogu prepakovali te je stavili u skrivena mjesta u unutrašnjosti vozila a zatim ista vozila predavali Topić Vinku koji je ovako skrivenu opojnu drogu prevezio preko državne granice BiH i R Hrvatske u više navrata pa je tako 19. 02. 2010. godine ovako upakovanu drogu Topić Vinko odvezao u mjesto Cista Provo u R. Hrvatskoj i to licu Ringwald Stjepanu koji je dana 22.02.2010. godine uhapšen od strane MUP-a Republike Hrvatske sa 5 kg opojne droge „skunk“ a što je sve ranije dogovorio Perić Dario zvani Crni.

Da bi potom, dana 21.02.2010. godine Rebac Željko i Falak Vedran na isti način prepakovali te skrili u vozilo Fiat Punto, unajmljeno u renta car kući „Intercat“ u Mostaru te isto predali Topić Vinku iz Ljubuškog, koji je ovako skrivenu opojnu drogu sa pmv Fiat Punto, odvezao u Rijeku, na način da je prešao granični prelaz Crveni grm, i uputio se prema Rijeci, da bi kada je došao blizu Rijeke, sišao sa auto puta na

skretanju za Krk, i odmah nakon naplatne rampe Topića je čekalo pmv Golf tip IV, tamne boje, HR reg. oznaka sa nekoliko lica kojima je Topić Vinko predao opojnu drogu u količini od 20 kg, a što je sve ranije dogovorio Perić Dario zvani Crni.

Nakon toga su dana 22.02.2010 godine, Rebac Željko i Falak Vedran na isti način prepakovali te skrili u vozilo osam (8) kg opojne droge skank te isto vozilo predali Topić Vinku iz Ljubuškog, koji je ovako skrivenu opojnu drogu prevezao preko granice R Hrvatske i predao je Šljivić Šimi u mjestu Delnice, Republika Hrvatska u večernjim satima a što je sve ranije dogovorio Perić Dario zvani Crni.

DAKLE: *Optuženi Falak Vedran i Rebac Željko, radnjama opisanim pod tačkama 1., 2. i 3. optužnice, optuženi Savić Stanko, radnjama opisanim po tačkama 1., i 2., optužnice i optuženi Orbović Dragan, radnjama opisanim pod tačkom 2., optužnice, postali članovi organizovane grupe ljudi radi neovlaštene međunarodne prodaje, prijenosa, držanja i prevoza supstanci ili preparata koji su propisom proglašeni opojnim drogama,*

ČIME SU: *počinili krivično djelo Organizovani kriminal iz člana 250. stav 1. KZ BiH, a u vezi sa krivičnim djelom Neovlašteni promet opojnim drogama iz člana 195. stav 2. KZ BiH.*

Pa ih Sud, na osnovu člana 250. stav 1. i člana 195. stav 2. KZ BiH i članova 39., 42., 48., 49. i 50. stav 1. tačka b) KZ BiH

O S U D U J E

OPTUŽENOG FALAK VEDRANA NA KAZNU ZATVORA U TRAJANJU OD 2 (DVIJE) GODINE i 6(ŠEST) MJESECI

OPTUŽENOG REBAC ŽELJKA NA KAZNU ZATVORA U TAJANJU OD 1 (JEDNE) GODINE i 8 (OSAM) MJESECI

OPTUŽENOG SAVIĆ STANKA NA KAZNU ZATVORA U TRAJANJU OD 1 (JEDNE) GODINE i 8 (OSAM) MJESECI

OPTUŽENOG ORBOVIĆ DRAGANA NA KAZNU ZATVORA U TRAJANJU OD 1 (JEDNE) GODINE i 6 (ŠEST) MJESECI

Na osnovu člana 56. KZ BiH optuženim se u izrečenu kaznu zatvora uračunava vrijeme provedeno u pritvoru i to: optuženim Falak Vedranu i Rebac Željku, od dana lišenja slobode 31.05.2010. godine do 16.07.2010 godine, optuženom Savić Stanku, od dana lišenja slobode 01.06.2010. godine do 26.08.2010 godine, optuženom Orbović Draganu, od dana lišenja slobode 31.05.2010. godine do 22.10.2010. godine.

Na osnovu člana 74.KZ BiH u vezi sa članom 195. stav 4. KZ BiH od optuženog Rebac Željka oduzima se opojna droga "skank", u ukupnoj neto masi od oko 30 kg., a koja opojna droga je pronađena u putničkom motornom vozilu marke "Nubira", reg. oznaka ZG 9927, koje koristi optuženi Rebac Željko.

Na osnovu člana 74. KZ BiH od optuženog Rebac Željka oduzima se digitalna mjerna vaga marke "Camry", kao predmet koji je korišten za izvršenje krivičnog djela, a koja je pronađena u garaži koju koristi optuženi Rebac Željko.

Na osnovu članova 110. i 111. KZ BiH od optuženog Orbović Dragana oduzima se protivpravna imovinska korist stečena izvršenjem krivičnog djela i to novac u ukupnom iznosu od 3.100,00 Eura.

Na osnovu člana 188. stav 1. ZKP BiH, optuženi Falak Vedran, Rebac Željko i Orbović Dragan se obavezuju naknaditi troškove krivičnog postupka, dok se na osnovu člana 188. stav 4. ZKP BiH, optuženi Savić Stanko oslobađa naknade troškova krivičnog postupka, o čemu će sud, a u skladu sa članom 186. stav 2. ZKP BiH, donijeti posebno rješenje nakon pribavljanja svih potrebnih podataka.

O b r a z l o ž e n j e

Dana 20.08.2010. godine Tužilaštvo Bosne i Hercegovine podiglo je optužnicu broj T-20 0 KT 0000 275 10, kojom se optuženi Perić Zvonko terti da je pod tačkom 1. i 2., predmetne optužnice počinio krivično djelo Organizovani kriminal iz člana 250. stav 3. a u vezi sa krivičnim djelom Neovlašteni promet opojnim drogama iz člana 195. stav 2., Krivičnog zakona Bosne i Hercegovine, optuženi Falak Vedran, Rebac Željko, Šutalo Miro, Savić Stanko i Orbović Dragan pod tačkom 1., 2., a Falak Vedran i Rebac Željko i pod tačkom 3., terte da su počinili krivično djelo Organizovani kriminal iz člana 250. stav 1. a u vezi sa krivičnim djelom Neovlašteni promet opojnim drogama iz člana 195. stav 2. Krivičnog Zakona Bosne i Hercegovine. Sudija za prethodno saslušanje Suda Bosne i Hercegovine je dana 24.08.2010. godine potvrdio navedenu optužni.

Na ročištu za izjašnjenje o krivici dana 16.09.2010 godine, optuženi Perić Zvonko, Falak Vedran, Rebac Željko, Šutalo Miro, Orbović Dragan i Savić Stanko izjasnili su se da nisu krivi za počinjenje krivičnog djela za koje se terete, te je predmet upućen vijeću radi zakazivanja pretresa. Dana 12.10.2010. godine, sudu su dostavljeni sporazumi o priznanju krivice zaključeni između optuženog Falak Vedrana, njegovog advokata Halilagić Suade, optuženog Rebac Željka i advokata Rajić Zdravka, optuženog Orbović Dragana, njegovog advokata Mehmedbašić Omara, optuženog Savić Stanka i njegovog advokata Nešković Gorana, s jedne

strane i tužioca Tužilaštva BiH, Čampara Dubravka, s druge strane, pa je sud donio rješenje i krivični postupak protiv optuženih Falak Vedrana, Rebac Željka, Orbović Dragana i Savić Stanka, u skladu sa članom 26. ZKP BiH razdvojio i odredio da se isti ima posebno dovršiti pred ovim sudom. Dana 21.10.2010. godine, sudu je dostavljena izmjenjena optužnica Tužilaštva Bosne i Hercegovine broj T20 0 KT 000027510 od 21.10.2010. godine, kojom je izmjenjen činjenični opis u odnosu na optužene Falak Vedrana, Rebac Željka, Orbović Dragana i Savić Stanka, na način kako je to opisano u predmetnoj optužnici, a kojim radnjama su optuženi Falak Vedran, Rebac Željko, Savić Stanko pod tačkom 1., i 2., Falak Vedran i Rebac Željko i pod tačkom 3., te optuženi Orbović Dragan pod tačkom 2., optužnice počinili krivično djelo Organizovani kriminal iz člana 250. stav 1., a u vezi sa krivičnim djelom Neovlašten promet opojnim drogama iz člana 195. Stav 2. Krivičnog zakona Bosne i Hercegovine.

U sporazumu o priznanju krivice od 16.09.2010. godine, optuženi Falak Vedran je priznao krivicu za krivično djelo opisano u tačkama od 1., 2., i 3., optužnice, odnosno počinjenje krivičnog djela Organizovani kriminal iz člana 250. stav 1. KZ BiH u vezi sa krivičnim djelom Neovlašten promet opojnim drogama iz člana 195. stav 2. KZ BiH. U istom sporazumu optuženi je prihvatio da mu se za isto izrekne kazna zatvora u trajanju od 2 (dvije) godine i 6 (šest) mjeseci, te je pristao da na poziv suda svjedoči pred Sudom BiH.

U sporazumu o priznanju krivice od 16.09.2010. godine optuženi Rebac Željko, priznaje krivicu za počinjenje krivičnog djela opisanog u tačkama 1., 2., i 3., Optužnice, odnosno počinjenje krivičnog djela Organizovani kriminal iz člana 250. stav 1. KZ BiH u vezi sa krivičnim djelom Neovlašten promet opojnim drogama iz člana 195. stav 2. KZ BiH. U istom sporazumu optuženi prihvata da mu se za isto izrekne kazna zatvora u trajanju od 1 (jedne) godine i 8 (osam) mjeseci, te je pristao da na poziv suda svjedoči pred Sudom BiH.

U sporazumu o priznanju krivice od 16.09.2010. godine, optuženi Savić Stanko priznaje krivicu za počinjenje krivičnog djela opisanog u tačkama 1., i 2., Optužnice, odnosno počinjenje krivičnog djela Organizovani kriminal iz člana 250. stav 1. KZ BiH u vezi sa krivičnim djelom Neovlašten promet opojnim drogama iz člana 195. stav 2. KZ BiH. U istom sporazumu optuženi prihvata da mu se za isto izrekne kazna zatvora u trajanju od 1 (jedne) godine i 8 (osam) mjeseci, te je pristao da na poziv suda svjedoči pred Sudom BiH.

U sporazumu o priznanju krivice od 16.09.2010. godine, optuženi Orbović Dragan priznaje krivicu za počinjenje krivičnog djela opisanog u tački 1. i 2., optužnice, tj. tački 2., precizirane optužnice, odnosno počinjenje krivičnog djela Organizovani kriminal iz člana 250. stav 1. KZ BiH u vezi sa krivičnim djelom Neovlašten promet opojnim drogama iz člana 195. stav 2. KZ BiH. U istom sporazumu optuženi prihvata da mu se za isto izrekne kazna zatvora u trajanju od 1 (jedne) godine i 6 (šest) mjeseci, i pristaje da na poziv suda svjedoči pred Sudom BiH

Naime, optuženi su potpuno i nedvosmisleno izjavili da se osjećaju krivim za djelo koje im je izmjenjenom optužnicom broj T-200 KT 0000 275 od 21.10.2010,

stavljeno na teret, izvršeno na način i u vrijeme navedeno u izmjenjenoj optužnici, te su jasno naglasili da u vrijeme zaključenja sporazuma nije bilo nikakvih prijetnji, ucjena, upotrebe sile, niti je na njih vršen pritisak da zaključe sporazume, te da su se na zaključenje sporazuma o priznanju krivice odlučili svjesno, i svojom voljom dali izjavu o priznanju krivice.

Nakon razmatranja sporazuma, sud se uvjerio da nema nikakve sumnje u pogledu slobodno izražene volje optuženih za zaključenje sporazuma o priznanju krivice. Prilikom odlučivanja, sud je ocijenio da su optuženi razumjeli da se sporazumom odriču prava na suđenje i da ne mogu uložiti žalbu na krivičnopravnu sankciju, koja će im se izreći. Uz to, optuženi su pregovarali o krivici sa Tužilaštvom BiH u prisustvu svojih branilaca tako da su imali adekvatnu pravnu pomoć. Pored toga, optuženi su pred sudom nedvosmisleno potvrdili da su upoznati sa svim zakonskim posljedicama zaključenja sporazuma, koje pravne posljedice su im i od strane suda neposredno predočene.

Da su optuženi zaista krivi za radnje i djela koja priznaju, po ocjeni suda, proizilazi, ne samo iz njihovih priznanja, nego i iz brojnih dokaza predočenih od strane Tužilaštva, a na koje odbrana nije imala nikakvih prigovora. Naime, sud se uvjerio da je broj i snaga dokaza opredijelila odbranu za pregovaranje i zaključivanje sporazuma, zbog čega je iz iznijetih razloga Sud sporazume i prihvatio. Cijeneći sve dostavljene dokaze Tužilaštva, sud je utvrdio da iz istih proizilazi da su optuženi počinili krivična djela koja im se stavljaju na teret, a radi se o sledećim dokazima : presjek operativnih saznanja br. 17-13-1-5-04-1-465-1/09 od 12.11.2009. godine, dopuna presjeka operativnih saznanja br. 17-13/1-5-04-1-465-2/09 od 01.12.2009 godine, prijedlog za izdavanje naredbe br. KTA-512/09 od 09.02.2010. godine, naredba Suda BiH br. X-KRN-10/876 od dana 10.02.2010. godine 3x, naredba OSA-i i SIPA-i za izvršenje naredbe br. KTA -512/09 od 11.02.2010.godine, naredba SIPA-i za izvršenje naredbe br. KTA -512/09 od 11.02.2010. godine, prijedlog SIPA-e za produženje i proširenje primjene posebnih istražnih radnji br. 17-13/1-5-04-1-465-13/09 od 02.03.2010. godine, sa priložima (5 službeni zabilješki i 1 CD disk) fotokopija kaznene prijave MUP-a R Hrvatske br.511-13-04-K-18/10 od 24.02.2010.godine, prijedlog za produženje i proširenje posebnih istražnih radnji br. KTA 512/09 od 08.03.2010. godine, naredba Suda BiH br. X-KRN-10/876 od dana 09.03.2010. godine, naredba OSA-i i SIPA-i za izvršenje naredbe br. KTA -512/09 09.03.2010.godine, službena zabilješka br. 17-13/2-04-1-18-62/10 od 12.03.2010.godine sa 1 CD diskom, prijedlog SIPA-e za produženje i proširenje primjene posebnih istražnih radnji br. 17-13/1-5-04-1-465-32/09 od 05.04.2010.godine, sa priložima (službena zabilješka i 2 CD diska), prijedlog za izdavanje naredbe br. KTA-512/09 od 07.04.2010. godine,naredba Suda BiH X-KRN-10/876 od 08.04.2010. godine ,naredba OSA-i za izvršenje naredbe br. KTA -512/09 od 08.04.2010.godine, prijedlog za izdavanje naredbe br.KTA-512/09 od 21.04.2010. godine,naredba Suda BiH br. X-KRN-10/876 od 22.04.2010. godine, naredba OSA-i za izvršenje naredbe br. KTA -512/09 od 22.04.2010.godine, prijedlog SIPA-e za produženje i proširenje primjene posebnih istražnih radnji br. 17-13/1-5-04-1-465-49/09 od 30.04.2010.godine, sa priložima (5 službenih zabilješki i 4 CD diska), naredba Suda BiH X-KRN-10/876 od

10.05.2010. godine, prijedlog za izdavanje dopune naredbe br.KTA-512/09 od 10.05.2010. godine, naredba Suda BiH X-KRN-10/876 od 11.05.2010. godine, naredba OSA-i za izvršenje naredbe br. KTA -512/09 od 11.05.2010.godine, prijedlog za izdavanje dopune naredbe br.KTA-512/09 od 13.05.2010. godine, naredba Suda BiH X-KRN-10/876 od 13.05.2010. godine, naredba OSA-i za izvršenje naredbe br. KTA -512/09 od 13.05.2010.godine, prijedlog za izdavanje naredbe br.KTA-512/09 od 31.05.2010. godine, naredba Suda BiH X-KRN-10/876 od 31.05.2010. godine, izvještaj o počinjenom krivičnom djelu i izvršiocima br.17-13-1-5-04-1-KU-29/10 od 01.06.2010.godine, sa priložima (izvještaj o pretresima, zapisnici o pretresu osoba, zapisnici o lišenju slobode, potvrde o privremenom oduzimanju predmeta, zapisnici o pretresu stana i dr. prostorija, zapisnici o uviđaju, zapisnici o saslušanju osumnjičenih, usmene naredbe za pretres, zapisnik o vještačenju biljne materije i dr.), naredba o zadržavanju osumnjičenih lica br T20 0 KT 0000275 10 od 01.06.2010. godine, zahtjev za postavljanje branioca po službenoj dužnosti br T20 0 KT 0000275 10 od 01.06.2010. godine, zapisnik o ispitivanju osumnjičenog Perić Zvonka od 02.06.2010.godine, zapisnik o ispitivanju osumnjičenog Falak Vedrana od 02.06.2010.godine, zapisnik o ispitivanju osumnjičenog Rebac Željka od 02.06.2010.godine, zapisnik o ispitivanju osumnjičenog Mire Šutala od 02.06.2010.godine, zapisnik o ispitivanju osumnjičenog Orbović Dragana od 02.06.2010.godine, zapisnik o ispitivanju osumnjičenog Stanka Savića od 02.06.2010.godine, prijedlog za određivanje pritvora br T20 0 KT 0000275 10 od 01.06.2010. godine, rješenje Suda BiH o određivanju mjere pritvora br. X-KRN-10/876 od 02.06.2010. godine, rješenje Suda BiH o ispravci rješenja Suda BiH od 02.06.2010. godine br. X-KRN-10/876 od 03.06.2010. godine, dopis SIPA-e br. 17-09/2-04-7-418-15/10 od 03.06.2010. godine, sa priložima (izvještaj o izvršenom operativno tehničkom nadzoru, fotografije i DVD), dopis SIPA-e br. 17-13/1-5-04-1-465-83/09 od 08.06.2010. godine, sa priložima (6 x fotodokumentacija sa pretresa stanova, vozila, pronalaska biljne zeljaste materije i službena zabilješka), zapisnik o saslušanju svjedoka Topić Vinka br. KTA 512/09 od 08.06.2010.godine, zapisnik o saslušanju svjedoka Topić Vinka br. KT 512/09 od 17.06.2010.godine, zapisnik o ispitivanju osumnjičenog Perić Zvonka od 17.06.2010.godine, naredba za hemijsko vještačenje br. T20 0 KT 0000275 10 od 18.06.2010. godine, naredba za vještačenje mobitela i SIM kartica br. T20 0 KT 0000275 10 od 23.06.2010. godine, prijedlog za produženje pritvora br. T20 0 KT 0000275 10 od 24.06.2010. godine, zapisnik o ispitivanju osumnjičenog Falak Vedrana od 29.06.2010.godine, nalaz vještačenja biljnog materijala i tragova MUP-a, Republike Srpske br. 02-7-1-233-1163.1/10 od 02.07.2010.godine, nalaz o izvršenoj papilaroskopskoj pretrazi mikro vage, nalaz i mišljenje vještačenja F MUP-a, Uprava policije br. 09-14/1-1-04-5-3120 od 28.07.2010.godine sa priložima (materijal sa vještačenja i fotodokumentacija br. 09-14/1-1-04-5-3120 od 28.07.2010.godine), nalaz vještačenja mobilnih telefona SIPA-e u formi Službenog izvještaja broj: 17-09/2-04-7-752-5/10 od dana 20. 08. 2010. godine sa sedam(7)g priloga u pisanoj formi jednim CD diskom.

Prilikom odlučivanja o krivičnopravnim sankcijama optuženih Falak Vedrana, Rebac Željka, Orbović Dragana i Savić Stanka za djelo za koje su

oglašeni krivim, sud je shodno članu 48 KZ BiH imao u vidu zakonski okvir kažnjavanja za krivično djelo Organizovani kriminal iz člana 250. stav 1. u vezi sa krivičnim djelom Neovlašten promet opojnim drogama iz člana 195. stav 2. KZ BiH, ali i sve okolnosti koje mogu biti od uticaja da kazna bude veća ili manja, a naročiti stepen krivične odgovornosti svakog od optuženih, pobude iz kojih su djela učinjena, jačinu ugrožavanja zaštićenog dobra, okolnosti pod kojim su djela učinjena, kao lične i porodične prilike optuženih, njihovo držanje nakon učinjenog djela i druge okolnosti. Sud je prilikom odmjeravanja kazne, u konkretnom slučaju, u vidu imao sve olakšavajuće i otežavajuće okolnosti na strani optuženih, te primjenio odredbe o ublažavanju kazne iz člana 49. i 50. stav 1. tačka b) KZ BiH. Od olakšavajućih okolnosti, sud je cijenio samo priznanje izvršenja krivičnog djela, korektno držanje optuženih pred sudom, doprinos i pomoć koju su optužni pružili Tužilaštvu Bosne i Hercegovine u otkrivanjem istovrsnih krivičnih djela i drugih osumnjičenih lica, te izraženo kajanje, zatim činjenicu da su optuženi porodični ljudi, da ranije nisu osuđivani, te da su optuženi Falak, Rebac i Orbović, roditelji malodobne djece. Od otežavajućih okolnosti na strani optuženog Falak Vedrana, sud je našao činjenicu da je optuženi, krivično djelo učinio kao službeno lice, odnosno policijski službenik u Policijskoj upravi Čapljina, a koji je s obzirom na posao koji obavlja bio dužan takva djela sprečavati. Sud nalazi da olakšavajuće okolnosti, a posebno one koje se odnose na pomoć koju su optužni pružili Tužilaštvu Bosne i Hercegovine u otkrivanjem istovrsnih krivičnih djela i drugih osumnjičenih lica, kao i neosuđivanost istih, predstavljaju osobito olakšavajuće okolnosti koje ukazuju da se i sa ublaženom kaznom zatvora može postići svrha kažnjavanja, pa je optuženim izvršio ublažavanje kazne primjenom člana 49. i 50. Stav 1. Tačka b) KZ BiH i izrekao kaznu zatvora ispod posebnog minimuma propisane kazne za ovo krivično djelo, tako što je optuženog Falak Vedrana osudio na kaznu zatvora u trajanju od 2 (dvije) godine i 6 (šest) mjeseci, optuženog Rebac Željka na kaznu zatvora u trajanju od 1 (jedne) godine i 8 (osam) mjeseci, optuženog Orbović Dragana na kaznu zatvora u trajanju od 1 (jedne) godine i 6 (šest) mjeseci i optuženog Savić Stanka na kaznu zatvora u trajanju od 1 (jedne) godine i 8 (osam) mjeseci nalazeći da će se sa ovakvom kaznom kao kaznom po vrsti postići svrha kažnjavanja, a da je njena visina u srazmjeri sa osobito olakšavajućim okolnostima koje su navedene. Sud je zaključio da će se sa ovakvom vrstom krivične sankcije u odnosu na optužene postići svrha kažnjavanja (specijalna prevencija), kao i uticaj na potencijalne počinioce ovih krivičnih djela da se klone kriminogene aktivnosti (generalna prevencija).

Na osnovu člana 56. stav 1. KZ BiH u izrečenu kaznu zatvora optuženim uračunato je vrijeme provedeno pritvoru i to optuženom Falak Vedranu i Rebac Željku od 31.05.2010. godine do 16.07.2010. godine, optuženom Savić Stanku od 01.06.2010. godine do 26.08.2010. godine, optuženom Orbović Draganu od 31.05.2010. godine do 22.10.2010. godine.

Na osnovu člana 74. KZ BiH u vezi sa članom 195. stav 4. KZ BiH, od optuženog Rebac Željka oduzima se opojna droga "skank", u ukupnoj neto masi od oko 30 kg., a koja opojna droga je pronađena u putničkom motornom vozilu marke "Nubira", reg. oznaka ZG 9927, koje je koristio optuženi Rebac Željko.

Na osnovu člana 74. KZ BiH, Sud je donio odluku da se od optuženog Rebac Željka oduzme digitalna mjerna vaga marke "Camry", kao predmet koji je korišten za izvršenje krivičnog djela, a koja je pronađena u garaži koju koristi optuženi Rebac Željko.

Odredba člana 110. KZ BiH, propisuje da niko ne može zadržati imovinsku korist stečenu krivičnim djelom. Izricanjem mjere oduzimanja imovinske koristi koju je stekao na protivpravan način učinilac krivičnog djela lišava se imovinske koristi koju je stekao izvršenjem krivičnog djela. Sud protivpravo stečenu imovinsku korist oduzima po službenoj dužnosti bez obzira da li postoji prijedlog tužioca u tom smjeru. I član 111. KZ BiH, određuje da će se svaka imovinska korist koja je pribavljen akriivičnim djelom oduzeti od osobe čija je odgovornost utvrđena u postupku koji se void protiv te osobe. Obzirom da je optuženi Orbović Dragan oglašen krivim za počinjenje krivičnog djela Organizovani kriminal iz člana 250. stav 1. u vezi sa krivičnim djelom Neovlašten promet opojnim drogama iz člana 195. stav 2. KZ BiH i da je od istog oduzet novac u iznosu od 3100 Eura, a što ujedno predstavlja iznos protivpravno stečene imovinske koristi, sud je shodno odredbama člana 110. i 111 KZ BiH, donio odluku da od optuženog Orbović Dragana oduzme ovako stečenu imovinsku korist i to u ukupnom iznosu od 3.100 Eura.

Sobzirom da su optužen Falak Vedran, Rebac Željko i Orbović Dragan oglašeni krivim, isti su na osnovu člana 188. stav 1. a u vezi sa članom 186. stav 2. ZKP BiH, obavezni na plaćanje troškova krivičnog postupka, čiji će iznos sud utvrditi posebnim rješenjem po pribavljanju relevantnih podataka. Na osnovu člana 188. stav 4. ZKP BiH, sud je optuženog Savić Stanka oslobodio plaćanja troškova krivičnog postupka, pa u tom dijelu isti padaju na teret budžetskih sredstava. Prilikom donošenja ove odluke, sud je imao u vidu dokaze koje je odbrana priložila u svrhu oslobađanja plaćanja troškova krivičnog postupka, a iz kojih proizilazi zaključak suda da je optuženi lošeg imovnog stanja, te da bi plaćanjem istih bilo dovedeno u pitanje izdržavanje optuženog i osoba koje je po zakonu dužan izdržavati.

Zapisničar

Tanja Curović

**PREDSJEDNIK VIJEĆA
SUDIJA**

Biljana Ćuković

POUKA : Protiv ove presude dozvoljena je žalba vijeću Apelacionog odjeljenja suda u roku od 15 dana od dana prijema iste. Obzirom da je presuda donesena na osnovu sporazuma o priznanju krivnje, žalba na krivičnopravnu sankciju nije dozvoljena.